

ՍՏ. ՊԱԼԱՍԱՆՅԱՆԻ ՍՈՑԻԱԼ-ՔԱՂԱՔԱԿԱՆ ՀԱՅԱՑՔՆԵՐԻ
ԳՆԱՀԱՏՄԱՆ ՄԱՍԻՆ

ԳԵՎՈՐԴ ԽԵԴՈՑԱՆ

Հայ հասարակական-քաղաքական հոսանքների պատմության դեռևս չլուծված հարցերից մեկը ականավոր պատմաբան, լեզվաբան, գրականության տեսաբան, փիլիսոփա, հրապարակախոս և մանկավարժ Ստ. Պալասանյանի (1837—1889) քաղաքական-գաղափարական դիրքորոշման հարցն է։ Նրա գործունեության և թողած գրական ժառանգության ուսումնասիրության մեջ զբաղվել են շատերը, բայց գնահատել են տարբեր կերպ։ Տարակարծությունը մեծ է հատկապես նրա սոցիալ-քաղաքական հայացքների գնահատման հարցում։ Այսպես, սովետահայ անվանի պատմաբան Ա. Հովհաննիսյանը Ստ. Պալասանյանին բնութագրում է որպես ազգային-պահպանողական գործչի¹, Հ. Գաբրիելյանը՝ որպես հայ առաջադեմ բուրժուազիայի գաղափարախոսի², Ս. Թովմասյանը՝ բուրժուական լիբերալի³ և այլն։ Միայն բանաստեղծ Հ. Հովհաննիսյանը, որը եղել է Ստ. Պալասանյանի ընկերը և համախոհը, նրան բնութագրում է որպես աշխատավոր ժողովրդի գաղափարախոսի և իս. Աբովյանի հետևորդի⁴։ Թե իրականում հասարակական-քաղաքական ի՞նչ ուղղության է հարել Ստ. Պալասանյանը և թե ո՞րն է եղել նրա գաղափարական դավանանքը կարելի է ճիշտ որոշել Ստ. Պալասանյանի սոցիալ-քաղաքական ըմբռնումներով, որոնց քննությանը նվիրված է ներկա հոդվածը։

1868 թ. Թիֆլիսի «Մեղու Հայաստանի» թերթը տպագրեց իր աշխատակից Ստ. Պալասանյանին ուղղված մի նամակ, որտեղ նամակագիրը խնդրում էր բացատրել, թե ինչո՞ւ կյանքում սոցիալական շարիքներ կան և ի՞նչն է պատճառը, որ հասարակության մի մասն աշխատում է վնասել մյուս մասին, «աշխատում է բռնանալ» մյուս մասի վրա։ Իր պատասխան նամակում Ստ. Պալասանյանը գրում է, որ շնայած «ծանր է» այդ կնճռոտ հարցերի պարզաբանումը, բայց և այնպես, հույս դնելով իր արտահայտած գաղափարների նկատմամբ «ներողամտություն ցուցաբերելու» վրա, կաշխատի մի քանի նամակներով պատասխանել նամակագրի հարցերին։

Ի հակադրություն «մարդը մարդուն գայլ է» սկզբունքի, որը հակամարտ հասարակարգերում տիրող իրավիճակի արդարացումն է, Ստ. Պալասանյանն այդ նամակում ելնում է այն մեկնակետից, թե «մարդը մար-

¹ Ա շ ո տ Հ ո վ հ ա ն ն ի ս յ ա ն, Նալբանդյանը և նրա ժամանակը, գիրք 1, Երևան, 1955, էջ 244, 278, գիրք 2, 1956, էջ 91 և հետո։

² Հ. Գ ա բ ռ ի ե լ յ ա ն, Հայ փիլիսոփայական մտքի պատմություն, հ. 3, Երևան, 1959, էջ 172, 196։

³ Ս. Ս. Թ ո վ մ ա ս յ ա ն, Ստ. Պալասանյանի գեղագիտական հայացքները, Երևան, 1959, էջ 27, 122։

⁴ Դրականության և արվեստի թանգարան, Մ. Բարխուդարյանի ֆոնդ, № 814։

դուն ևղբայր է և բարեկամ»։ Դրա ապացույցը նա տեսնում է մարդկանց հեռավոր անցյալում, երբ հասարակությունը չէր բաժանվել հակամարտ դասակարգերի և երբ մարդիկ փոխադարձաբար օգնում ու պաշտպանում էին միմյանց։ Ըստ Ստ. Պալասանյանի՝ հենց դա է մարդկանց կոչումը. մարդիկ, որում է նա, «պարտական էին միմյանց սիրելու, հարգելու, օգնելու, պաշտպանելու, ինչպես եղբայրական սիրով կապված և միավորված արարածներ»⁵, իսկ շարիք գործելը, ուրիշին վնասելը, ճնշելը ոչ միայն չեն բխում մարդու էությունից, այլև «մարդուս բնությանը բուրրովին անվայելուչ են»։ Այդ դեպքում ինչո՞վ բացատրել իրական կյանքում գոյություն ունեցող շարիքների, ճնշման ու շահագործման փաստը, ո՞րն է դրա պատճառը։ «Սորա պատճառը հենց մենք իրանք մարդիկս ենք,— պատասխանում է նա,— որոնք մոռացել ենք բնության օրենքները, որոնք մեռցրել ենք մեր մեջ մեր բնական դատավորի՝ խղճմտանքի ազդեցությունը»։ Բնության օրենքների դեմ մեղանշելով մարդիկ ստորացան, «դարձան միմյանց թշնամի, հարստահարող, ոմանք ասացին, ինչպիսի հին և միջին դարերում. մենք պետք է իշխենք, իսկ դուք հնազանդիք... դուք պետք է աշխատեք և մենք վայելենք, դուք պետք է շարչարվիք, իսկ մենք բավականության մեջ հղփանանք, որովհետև մենք ազնիվ ծագումն ունենք, մենք ձեզնից չենք»⁶, Նվազպես հասարակության անդամները, որ առաջ եղբայրաբար օգնում էին միմյանց, դարձան թշնամիներ. հասարակական կյանքի նորմալ, բնական վիճակը՝ խախտվեց և «միևնույն ազդի կամ հասարակության անդամները միմյանցից օտարացան, մեկը սկսավ մյուսին զրկել, մեկը սկսավ մյուսի վրա բռնանալ ու շատ տեղ մարդը դարձավ մարդու սեպականություն, առուտուրի առարկա, բավականության գործիք, մի խոսքով ստրուկ...»⁷։

Ֆրանսիական ուտոպիական սոցիալիզմի ներկայացուցիչների, մասնավորապես Ա. Սեն-Սիմոնի գաղափարական ազդեցությամբ Ստ. Պալասանյանն աշխատում էր ապացուցել, որ հասարակական կյանքի նորմալ, բնական վիճակը՝ սոցիալական շարիքների, դասակարգային հակամարտության, ճնշման ու շահագործման բացակայության և մարդկանց փոխադարձ օգնության հարաբերությունների վիճակն է։ Ահա թե ինչու էր նա դիմում նախնադարյան-համայնական հասարակարգի օրինակին, որը նրա համար մի կռիվն էր հասարակության անդամների տնտեսական հավասարությունը և փոխադարձ օգնությունը հասարակական կյանքի միակ նորմալ վիճակ հայտարարելու, ուտոպիական սոցիալիզմի գաղափարներ պրոպագանդելու համար։ Շատ արժեքավոր է նաև ճնշման ու շահագործման՝ Ստ. Պալասանյանի մերկացնող քննադատությունը։ Առաջին հայացքից կարող է թվալ, թե այդ քննադատությունն ուղղված է միայն ստրկության և ֆեոդալիզմի դեմ։ Սովորաբար, լիբերալ բուրժուազիայի գաղափարախոսները ևս խիստ քննադատում են ստրկությունն ու ֆեոդալիզմը, դրանք համարում են հակաբնական երևույթներ, որպեսզի արդարացնեն ու բնական հայտարարեն անմիջական արտադրողի անձնական ազատության վարագույրով վարպետորեն սքողված կապիտալիստական ճնշումն ու շահագործումը։

⁵ «Մեղու Հայաստանի», Թիֆլիս, 1868, № 16։

⁶ Նույն տեղում։

⁷ Նույն տեղում։

Հայտնի է, որ իր ժամանակին հայ հեղսոփոխական-ղեմակրատ Մ. Նալ-րանդյանը սլատոեկով անձնական ազատության այդ վարագույրը, հարցն այսպես էր դնում, թե «ազա՞տ եմ ես, միմիայն օրենքով, քաղաքականա-պիս ազատ կոչվելով, ազա՞տ եմ ես, քանի որ նյութական կարոտությունը ստիպում է ինձ, կամա ակամա, մի ուրիշին ստրկանալ, ուրիշին ծառայել և այդ ծառայությամբ հաց ճարել ընտանիքի համար»⁸։

Ստ. Պալասանյանը ևս հարցը նույն կերպ է դնում. անմիջական ար-տադրողի անձնական ազատությամբ արդյոք վերանո՞ւմ է սոցիալական ճնշումն ու շահագործումը և պատասխանում՝ ո՛չ։ Նա ցույց է տալիս, որ այնտեղ, որտեղ «մեկը մյուսի անձնական ազատությունը բառնալ շաշխա-տեց, միայն նորա աշխատանքի, նորա վաստակի վրա բռնացավ։ Այս ստրկությունից էլ ավելի թշվառություն եղավ մարդոց համար, որովհետև... աղատ, բայց աղքատը, ամենից թողած, չքավորությունից հալածված և ըս-տիպված պետք է լիներ շատ անգամ փողոցի մի անկյունում մեռնել»⁹։

Ինչպես տեսնում ենք, Ստ. Պալասանյանի մերկացնող քննադատու-թյունն ուղղված է ոչ միայն ստրկության ու ճորտության դեմ, այլև վարձու ստրկության դեմ, որը նա ավելի մեծ թշվառություն է համարում մարդկանց համար։ Ուստի, ոչ մի կերպ չի կարելի համաձայնվել Հ. Գաբրիելյանի այն պնդման հետ, թե Ստ. Պալասանյանը «մասնավոր սեփականատիրական հարաբերությունների կողմնակից է» և թե իբր նա չի հասկացել, «որ բուր-ժուական հասարակության մեջ մարդը, ըստ էության, նորից շարունակում է ստրկական վիճակի մեջ մնալ և անասելի շահագործման ենթարկվել»¹⁰, իրականում Ստ. Պալասանյանի քննվող նամակ-հոդվածում ուսուպիա-կան սոցիալիզմի տեսանկյունից քննադատվում է ինչպես մասնավոր սե-փականատիրությունը, այնպես էլ ամեն մի ճնշում ու շահագործում, այդ թվում նաև կապիտալիստականը։

Ահա թե ինչու Ստ. Պալասանյանը նախապես խնդրում էր ներողամտու-թյուն ցուցաբերել իր արտահայտած գաղափարների նկատմամբ։ Սակայն «Ա» նամակից հետո այլևս նամակներ չտպագրվեցին։ Թե ինչպիսի՞ն էր լի-նելու մյուս նամակների բովանդակությունը, դժբախտաբար, մեղ հայտնի չէ։ Դատելով առաջին նամակի բովանդակությունից կարելի է ենթադրել, որ նրանցում Ստ. Պալասանյանը քննելու էր (կամ մտադիր էր քննել) սոցիա-լական ճնշումից ու շահագործումից ազատագրվելու, հայ իրականությունը վերականգնելու ուղիների և միջոցների հարցը։ Այդ է վկայում այն փաս-տը, որ Ստ. Պալասանյանը հետագայում ամեն պատեհ առիթով շոշափում էր (լեզալ մամուլի ընձեռած հնարավորությունների սահմաններում) սո-ցիալական անհավասարության վերացման և հայ իրականության վերակա-ռուցման ուղիների ու միջոցների հարցը։

Նույն զարգացող հայ բուրժուազիայի գաղափարախոսները գտնում էին, որ Հայաստանի զարգացումը պետք է ընթանա կապիտալիստական ուղիով և առաջ էին քաշում հայ իրականության՝ եվրոպական քաղաքակրթության ոգով աստիճանաբար վերակառուցելու պահանջը։ Սակայն, եթե Հայաստանը

⁸ Մ. Ն ա լ Ր ա ն դ յ ա ն, Երկերի լիակատար ժողովածու, հ. 3, Նրևան, 1910, էջ 52։

⁹ «Մեղու Հայաստանի», 1868, № 16։

¹⁰ Հ. Գ ա բ Ր ի է լ յ ա ն, նշվ. աշխ., էջ 230։

նոր էր ոտք դնում կապիտալիստական զարգացման ուղին, ասյա Արևմուտքում կապիտալիզմն արդեն լրիվ դրսևորել էր իրեն սոցիալական չարիքների և անարդարությունների առումով: Դրա համար էլ հայ բուրժուազիայի որոշ հեռատես գաղափարախոսներ աշխատում էին խուսափել եվրոպական քաղաքակրթության որոշ այլանդակություններից, խուսափել կապիտալիստական ճնշման ու շահադործման ծայրահեղություններից: Այդուհանդերձ, նրանք բոլորն էլ գովերգում էին եվրոպական քաղաքակրթության «բարեմասնությունները», հատկապես, բուրժուական քաղաքական ազատությունները, բուրժուական դեմոկրատիան:

Ի հակադրություն բուրժուազիայի գաղափարախոսների, Մ. Նալբանդյանը հայ իրականության վերակառուցման և նրա հետագա զարգացման ուղիների հարցին մոտենում էր սոցիալական անհավասարության վերացման, տնտեսական խնդրի լուծման տեսանկյունից՝ գտնելով, որ բուրժուական քաղաքակրթությունը չի լուծել տնտեսական խնդիրը, որ քաղաքակրթ եվրոպայում էլ կյանքի առանցքը՝ այդ խնդրի լուծման համար մղվող պայքարն է: Նա արդարացնում էր պրոլետարիատի պայքարը և մարգարեաբար կանխագուշակում «սոսկալի փոթորիկներին» միջոցով տնտեսական խնդրի լուծման անխուսափելիությունը¹¹:

Մ. Նալբանդյանի գաղափարական ազդեցությամբ և նրա օրինակով Ստ. Պալասանյանը նույնպես հայ իրականության վերակառուցման և նրա հետագա զարգացման ուղիների հարցը կապում է սոցիալական անհավասարության վերացման, տնտեսական խնդրի լուծման հետ՝ հայտարարելով, թե եվրոպական «քաղաքակրթ ընկերությունների մեջ, ուր տնտեսական անհավասարությունը թշնամություն է առաջացնում զանազան դասերի մեջ, ուր պետության կարիքները մեծամեծ հարկեր են պահանջում, ուր մարդկանց հարաբերությունները բարդված են, դժվար բան է ազատությունն ու կարգը միմյանց հետ հաշտեցնելը»¹²: Նա լավ էր ըմբռնում, որ դասակարգային հակամարտության վրա խարսխված բուրժուական հասարակագում չի կարող լինել իսկական ազատություն, որ գովաբանվող բուրժուական քաղաքական ազատությունները կեղծիք են: «Եվրոպական ժողովուրդները երեվակայում են,— գրում է Ստ. Պալասանյանը,— թե հասարակապետությունը և ազատությունը հիմնելու համար՝ բավական է հրատարակել առաջինը և օրենքներ սահմանել երկրորդի համար: Խորտակում են մի կառավարություն, խմբագրում են մի նոր սահմանադրություն, ընդունում են հասարակապետական ձևեր, փոխում են փողոցների անունները, հավասարության նշանաբաններ դրոշմվում են հիշատակարանների վրա, և հետո, եթե ընդդիմություններ են երևում, եթե երկպառակություններ են ծագում, եթե վերջապես նոր շինությունը սպառնում է փուլ գալ, ամեն կողմից աղաղակում են դավաճանություն, և ամբաստանություններին վերջ չկա»¹³: Որքան համահնչուն են այս խոսքերը Մ. Նալբանդյանի խոսքերին: Ուշագրավ է նաև այն, որ Մ. Նալբանդյանի նման Ստ. Պալասանյանն էլ իր համակրանքն է

11 Մ. Նալբանդյան, Երկերի լիակատար ժողովածու, հ. 3, էջ. 56, 81:

12 «Փորձ», Թիֆլիս, 1877, № 4, էջ. 134:

13 Նույն տեղում:

արտահայտում կապիտալիզմի դեմ ուղղված «ընդդիմություններին» և արդարացնում դրանք:

Կարելի է կապիտալիզմի արդյունավետ քննադատության բազմաթիվ օրինակներ բերել, երբ Ստ. Պալասանյանը վարպետությամբ մերկացնում է կապիտալիզմի անբուժելի խոցերը, բացահայտում նրա հակասությունները: Այդ տեսակետից շատ արժեքավոր է ֆրանսիացի ականավոր կին զբոլ ժորժ Սանդի դործերի հայերեն թարգմանության առթիվ նրա դրած հոդվածը: Նրանում Ստ. Պալասանյանը բարձր է գնահատում ժորժ Սանդին՝ կապիտալիստական հասարակարգում տիրապետող սեփականատիրական ոգու և հարստացման մոլուցքի խիստ քննադատության համար, նշելով, որ ժորժ Սանդը կարողացավ «հմուտ բժշկի պես շոշափել հասարակության բազկերակը և ուշադրությամբ ականջ դնել նորա սրտի անկանոն բաբախմանը: Ընդհանուր ապականության ազդեցությունը կատարելապես ըմբռնելու և ուրիշին բացատրելու համար՝ պետք էր քրքրել ու գտնել նորա բուն պատճառները»¹⁴: Իսկ ժորժ Սանդը, որ գտնվում էր Ա. Սեն-Սիմոնի և նրա հետևորդների ուստիական սոցիալիզմի գաղափարների ազդեցության տակ, կադիտալիզմի հակասությունների, սոցիալական շարիքների ու անարդարությունների հիմնական պատճառը համարում էր մասնավոր-կապիտալիստական սեփականությունը: Կապիտալիզմի արդյունավետ քննադատության և հասարակ ժողովրդի շահերի պաշտպանության համար նա մեծ ժողովրդագրականություն էր վայելում ոչ միայն Ֆրանսիայում և ողջ Եվրոպայում, այլև Ռուսաստանում: Հայտնի է, որ ռուս հեղափոխական դեմոկրատներ Վ. Բելինսկին և Ն. Չերնիշևսկին շատ բարձր են գնահատել նրա գործերի քննադատական ոգին:

Ստ. Պալասանյանը նույնպես դրվատանքի խոսքեր չի խնայում ժորժ Սանդի հասցեին ամենից առաջ հենց այդ քննադատական ոգու համար, ինչպես ինքն էր արտահայտվում, այն բանի համար, որ ժորժ Սանդը ճիշտ էր ըմբռնել բուրժուական հասարակարգում տիրող «ընդհանուր ապականությունը» և մերկացրել էր նրա անբուժելի խոցերը: Ճնշան իրավամբ անվանեցին հասարակական ախտերի բանաստեղծ և այդ ախտերի ճիշտ նկարագրությամբ ցույց տվեց նոցա զարհուրելի ու զզվելի երևույթները»¹⁵: Եվ Ստ. Պալասանյանը խիստ դատապարտում էր քուրժուական այն գրչակներին, որոնք կատաղի պայքար էին սկսել ժորժ Սանդի դեմ միայն նրա համար, որ վերջինս ճայրական անվեհերությամբ խաբեության քողը պատռել և մերկացրել էր հասարակական կյանքի փտած ու նեխած վերքերը»¹⁶:

Պարզ է, որ Ստ. Պալասանյանի վերաբերմունքը կապիտալիզմի նկատմամբ բացասական է. կապիտալիզմը այն հասարակարգը չէ, որը կհամապատասխաներ ռենույան օրենքին», այն «հակաբնական քաղաքական կազմակերպություն է», սոցիալական շարիքների և անարդարության հասարակարգ: Իր քննադատական հոդվածներից մեկում նշելով, որ կապիտալիզմի օրոք «մարդկային ընկերության մեջ այլ և այլ անբնական երևույթներ կազմվել, այլ և այլ ախտեր են բուն դրել», Ստ. Պալասանյանը ցույց էր

¹⁴ Նույն տեղում, № 3, էջ 297:

¹⁵ Նույն տեղում:

¹⁶ Նույն տեղում, էջ 298:

տալիս բուրժուական շրջանային հարաբերությունների բոլոր անբնականությունն ու վնասակարությունը», բարձր դասերի զեղծմունքները և «ստորինների անմխիթար դրությունը, կանանց, մշակ և երկրագործ դասերի տրեստեսական ու բարոյական թշվառությունը»¹⁷:

Եթե կապիտալիզմը հակաբնական հասարակարգ է, նշանակում է այն ենթակա է փոխարինման նոր, արդարացի հասարակարգով, որը կհամապատասխաներ մարդկանց կոշմանը և ռեալության օրենքին: Բայց կոնկրետ ինչպիսի՞ հասարակարգով: Ստ. Պալասանյանի իդեալը այնպիսի հասարակարգն էր, ուր չէին լինի սոցիալական շարիքներ, ճնշում և շահագործում, ուր իրականացված կլինեին հասարակության անդամների տնտեսական հավասարությունը, համերաշխությունն ու միասնությունը: Ապագա արդարացի հասարակությունը նա պատկերացնում է համերաշխ գերդաստանի ձևով. «Ինչպես մի գերդաստանի մեջ ամեն անդամ միևնույն շահն ունի աչքի առաջ, նույնը պետք է լինեի և հասարակությանը և ազգերի մեջ... Գերդաստանի մեջ յուրաքանչյուր անդամ յուր ընդունակությանը, յուր կարողությանը չափ ծառայում է ու աշխատում ամենի շահի համար... ինչ որ վաստակվում է, ամենքը հավասարապես վայելում են, ամեն բան եւրայրարար կատարվում է»¹⁸: Գերդաստանի մեջ «մեծը, թե փոքրը, զորեղը, թե տկարը, առողջը, թե հիվանդը, տնաշեն տանտիկինը, թե քնքուշ օրիորդը», բոլորն աշխատում են ըստ իրենց ընդունակությունների և «բոլորն էլ հավասար վայելում են հասարակաց բարիքը»¹⁹:

Ակնհայտ է, որ Ստ. Պալասանյանը ապագա արդարացի հասարակության իր ըմբռնումով հարում էր ուտոպիական սոցիալիզմի գաղափարներին: Ուտոպիստ սոցիալիստների օրինակով նա սպառողական և հավասարարական մոտեցում էր ցուցաբերում ապագա հասարակության նկատմամբ, գտնելով, որ դիսավորը և հիմնականը արդարացի հասարակարգում հավասարության իրականացումն է սպառման ընագավառում, երբ յուրաքանչյուրն աշխատում է ըստ իր ընդունակությունների, բայց սպառում է բոլորին հավասար:

Ուտոպիական սոցիալիզմի գաղափարները, մարդկանց հավասարության սկզբունքի կրքոտ պաշտպանությունը բխում են Ստ. Պալասանյանի դեմոկրատիզմից: Այդ գաղափարների մեջ իրենց արտահայտությունն են գտել աշխատավոր զանգվածների դարավոր իղձերը և ձգտումները իդեալական, երջանիկ կյանքի մասին: Որպես դեմոկրատ մտածող՝ Ստ. Պալասանյանը երազում է իրականացած տեսնել մարդկանց հավասարությունը: Նա հավասարության ջատագով է. «Բոլոր մարդիկ, ասում ենք ամենայն իրավամբ,— գրում է Ստ. Պալասանյանը,— ամենամեծ իշխանից սկսած մինչև ետին գեղջուկը, ազնվականից մինչև վերջին ռամիկը, լուսավորյալ և տգետ, սպիտակամորթ և սևամորթ, միևնույն մտավոր և բարոյական ձիրքերն ունեն, տարբերությունը առաջ է գալիս միայն ընդունակությունների ավել կամ պակաս մշակելուց կամ շմշակելուց, բայց և այս անհարթությունը ժամանակով անհայտանալու է»²⁰: Մարդկանց, ազգերի, ռասաների հավասարու-

¹⁷ Նույն տեղում, 1879, էջ 131:

¹⁸ «Մեղու Հայաստանի», 1868, № 16 (ընդգծումը մերն է.— Գ. Խ.).

¹⁹ Նույն տեղում:

²⁰ «Փորձ», 1877/78, № 1, էջ 136:

թյան սկզբունքը և հավատն սյդ սկզբունքի հաղթանակի նկատմամբ այն բնորոշ գիծն է, որ կարմիր թելի նման անցնում է Ստ. Պալասանյանի աշխատությունների միջով և ցույց տալիս նրա հայացքների դեմոկրատական ուղղվածությունը: Իսկ, որոշ վերապահումով, ընդունում է նաև Ստ. Պալասանյանին լիբերալ մտածող որակող Ս. Թովմասյանը. «Մագոմից, սոցիալական դիրքից ու ռասայական պատկանելիությունից անկախ՝ բոլոր մարդկանց հավասարության այս պաթոսն այն դեմոկրատական գծի արտահայտությունն է, որ երբեմն շատ ցայտունորեն երևան է գալիս Ստ. Պալասանյանի աշխարհայացքում»²¹:

Իսկ ինչպես է իրականացվելու այդ հավասարությունը, ինչ ճանապարհով է վերակառուցվելու հասարակական կյանքը: Սա մի առանցքային հարց էր, որն ուներ ոչ միայն տեսական, այլև գործնական խոշոր նշանակություն, որովհետև անմիջականորեն շոշափում էր հայ իրականության վերակառուցման հրատապ խնդիրը:

Ստ. Պալասանյանը ոչ միայն ուտոպիական սոցիալիզմի գաղափարների ջերմ պաշտպան էր, այլև միշտ մեծ գովեստով էր արտահայտվում սոցիալական հեղափոխության մասին: Սոցիալական հեղափոխության և ազգային-ազատագրական պայքարի նկատմամբ նրա դրական վերաբերմունքն անվերապահ է: Այս տեսակետից համոզիչ չի թվում Ս. Թովմասյանի այն կարծիքը, թե «սոցիոլոգիական կատակլիզմների» ծայրահեղությունները «վախեցնում են լիբերալ» Ստ. Պալասանյանին, թե «խիստ բնորոշ է այն երկդիմի զննատմականը, որ նա տալիս է ֆրանսիական ուղյուղիային», թե հեղափոխության զննատման հարցում նրա մոտ «լիբերալը հաղթահարում է դեմոկրատին»²², որովհետև, դրական արտահայտվելով ֆրանսիական հեղափոխության մասին, Ստ. Պալասանյանը միաժամանակ դժգոհում է նրանից, որ վերջինս «ծնունդ է տվել» մի անտանելի դիկտատուրայի: Իսկ թե ո՞րն է այդ դիկտատուրան, որից դժգոհ է Ստ. Պալասանյանը, Ս. Թովմասյանը չի պարզաբանում: Բայց ահա թե ինչ է գրում Ստ. Պալասանյանը 1789 թ. ֆրանսիական հեղափոխության մասին. «Ֆրանսիական հեղափոխությունը, այս մեծ ու վսնմ փորձը մարդկանց մեծագույն մասը փոքրագույն մասի դարևոր ճնշողությունից ու հարստահարությունից ազատելու, մի նոր դարագլուխ բաց արավ մարդկության համար, հուսո ու երջանկության դարագլուխ. բայց միևնույն ժամանակ նա ծնունդ տվավ մի անտանելի դիկտատուրության, որ թեև կարճատև կյանք ունեցավ, այնուամենայնիվ մեծապես ծանրացավ ազգերի վրա: Նապոլեոն Ա յուր աշխարհակալական ձգտումներով եվրոպական ժողովուրդների ազգայնության իրավունքը վիրավորեց»²³:

Ստ. Պալասանյանը դժգոհում էր, որ ֆրանսիական հեղափոխությունը միայն փորձել է մարդկանց մեծագույն մասը փոքրագույն մասի ճնշումից ու հարստահարումից ազատել, բայց չի իրականացրել: Եվ դա հասկանալի է. քննադատական ուտոպիական սոցիալիզմի գաղափարներին հարող Ստ. Պալասանյանը պետք է, որ դժգոհ լիներ բուրժուական հեղափոխության ար-

21 Ս. Ս. Թովմասյան, նշվ. աշխ., էջ 27.

22 Նույն տեղում, էջ 22.

23 ՎՓորձ, 1879, № 2, էջ 130.

դյունքից, այսինքն՝ կապիտալի տիրապետության հաստատումից: Բայց դա ամենևին էլ չի նշանակում, թե «ամեն մի ռևոլյուցիա նա համարում էր ծանրոր հորձանք մարդկության համար»²⁴: Այդ են ապացուցում նաև Ստ. Պալասանյանի արտահայտած մյուս մտքերը բուրժուական հեղափոխությունների մասին:

Իր հոգվածներից մեկում, անդրադառնալով սենտիմենտալիզմի և հեղափոխական ռոմանտիզմի ծագման պատճառներին, Ստ. Պալասանյանը գրում է, թե ժողովուրդը բուրժուական հեղափոխությունների հետևանքով հաստատված կապիտալիստական կարգի մեջ «բավարարություն չգտնելով», իր հայացքը դարձրեց դեպի անցյալը՝ «հույս ունենալով այնտեղ գտնել մի իդեալ», որով հնարավոր լիներ մարդկանց «վհատած սրտերը սփռել»: «ԺԸ-ը դարու եվրոպական ընկերության ցավալի վիճակը և նույն ժամանակ տեղի ունեցած քաղաքական հեղափոխությունները ծանր տպավորություն գործեցին ժամանակակիցների հոգու վրա: Ամենալուսավորյալ ու հառաջադեմ անձինքը սկսան կասկածել այն քաղաքակրթության վրա, որի շնորհիվ այնքան զեղծմունքներ էին մտել մարդկանց մեջ և կարծել թե բուն երջանկությունը միայն նախնական պարզության մեջ կարելի է գտնել...»²⁵:

Ինչպես տեսնում ենք, Ստ. Պալասանյանը դարձյալ դժգոհ է բուրժուական հեղափոխության արդյունքից և նշում է, որ այդ հեղափոխության հետ մեծ հույսեր կապած «ամենալուսավորյալ ու հառաջադեմ անձինք» (խոսքը Ժ.-Ժ. Ռուսսոյի, Զ. Բայրոնի, Ի. Գյոթեի, Ի. Շիլլերի և Վ. Հյուգոյի մասին է) նրա իրականացումից հետո հիասթափվեցին, որովհետև այդ հեղափոխությունների հետևանքով հաստատված նոր քաղաքակրթությունը՝ կապիտալիստական կարգը, իր հետ նոր չարիքներ բերեց: Իրենց սպասելիքներից հուսախաբված՝ նրանք երեսները շրջեցին դեպի վաղ անցյալի պարզունակ կյանքը: Եվ դրանում նա իրավացի էր: «Ընդհանուրը և բնորոշը ռոմանտիկական ամբողջ հոսանքի համար եղել է հենց այն,— գրում է Ա. Լունաչարսկին,— որ այդ գրականությունն արտացոլել է ֆրանսիական հեղափոխության և ազատության, հավասարության ու եղբայրության իրականացման հույսերի խորտակման դարաշրջանը»²⁶:

Ստ. Պալասանյանը դժգոհ էր նաև, որ ֆրանսիական հեղափոխությունը «ծնունդ էր տվել» նապոլեոնյան դիկտատուրային, որ նապոլեոնը ստրկացրել էր եվրոպական շատ ժողովուրդներին: Եվ դրանում նույնպես նա իրավացի էր: Հայտնի է, որ Վ. Ի. Լենինը բացասաբար է արտահայտվել նապոլեոնյան կայսրության մասին ամենից առաջ այն բանի համար, որ նապոլեոնը հիմնել էր «ֆրանսիական կայսրությունը՝ ստրկացնելով եվրոպայի վաղուց կազմավորված, խոշոր, կենսունակ ամբողջ մի շարք ազգային պետություններ»²⁷:

Մեր կարծիքով, ֆրանսիական հեղափոխության պատմական դերի գնահատման մեջ, ինչպես նաև բուրժուական հեղափոխությունների մասին Ստ. Պալասանյանի արտահայտած վերոհիշյալ մտքերում ցայտուն կերպով երևում է ոչ թե պահպանողականի կամ լիբերալի, այլ դե-

²⁴ Ս. Ս. Բոլմասյան, նշվ. աշխ., էջ 117:

²⁵ «Փորձ», 1879, № 2, էջ 130:

²⁶ А. В. Луначарский, Собрание сочинений, т. 4, М., 1964, էջ 272:

²⁷ Վ. Ի. Լենին, Երկեր, հ. 22, էջ 415:

մոկրատի և սոցիալիստի ոգին։ Ընդհանրապես, Ստ. Պալատականի թողած հարուստ գյուղական ժառանգության մեջ անհնար է ցույց տալ սոցիալական հեղափոխությունը և աղային-ազատագրական պայքարն ուղղակի կամ անուղղակի դատապարտող որևէ միտք։ Այնինչ անժխտելի փաստ է, որ նա բազմիցս գովեստով է արտահայտվել սոցիալական հեղափոխության մասին։ Այս առումով, վերը բերված փաստերից բացի, կարելի է վկայակոչել Ստ. Պալատականի «Հունաստանի անկախությունը»²⁸ և «Հունգարացոց ազգային բանաստեղծությունը 1848—1849-ի պատերազմի ժամանակ»²⁹ ծավալուն հոդվածները։ «Հունաստանի անկախությունը» հոդվածում Ստ. Պալատականը, քաջալերելով ճնշված ժողովուրդների անկախության համար մղած պայքարը, նշում է, «Ֆրանսիական հեղափոխության մեծ հրդեհը հարկավոր էր, ոտ այս թմրած ժողովուրդների մեջ շարժողություն ձգելը»³⁰։ Նա միանգամայն ճիշտ է նշում ֆրանսիական հեղափոխության բարերար ազդեցությունը ազգային-ազատագրական պայքարի վերելքի վրա և ճիշտ է ըմբռնում, որ ազատության ու անկախության գաղափարի բողոքները «ազատ կերպով աճեցան միայն այն ժամանակ, երբ ֆրանսիական հեղափոխության թարմ օդը ավելի հաստատուն սնունդ տվեց այդ բողոքներին»³¹։

Սոցիալական հեղափոխության գովերգման պաթոսն ավելի ցայտուն է դրսևորվել «Հունգարացոց ազգային բանաստեղծությունը 1848—1849-ի պատերազմի ժամանակ» հոդվածում, որտեղ Ստ. Պալատականը հունգարական հեղափոխությունը որակում է որպես անկախության ու ազատության համար մղված «հերոսական պատերազմ», դարի ամենանշանավոր իրադարձություն, իսկ հունգարական պառլամենտը՝ «Սվրոպայի ամենանշանավոր ամբիոնը»։ Ըստ որում, հիացմունքով խոսելով հունգար ժողովրդի հերոսության մասին, դեմոկրատ Ստ. Պալատականը հատկապես նշում է հասարակ ժողովրդի որոշիչ դերը հեղափոխության հաղթանակի մեջ, չքավոր, աշխատավորական զանգվածների ցուցաբերած վճռականությունն ու անձնուրացությունը, ասելով՝ թե՛ «նոցանից շատը ոչինչ չունեին կորցնելու. նոքա ուրախությամբ երգում էին իրենց անհոգ ազատությունը, երբեմն հեզնական խոսքեր արձակելով իրանց հարուստ ընկերների դեմ»³², որոնք անվճռական էին, որովհետև վախենում էին կորցնել իրենց հարստությունը։ Նա արտակարգ ոգևորությամբ է գովերգում հեղափոխությունն ու աղատությունը։ Եթե դուք հարցնեք հեղափոխության զինվորին, ասում է Ստ. Պալատականը, «թե ո՞րն է այն գերագույն բարիքը, որի համար նա պատրաստ է յուր և ուրիշների արյունը թափել, նա կպատասխանե ձեզ. Ազատությունը... Դա մի արյունագույն վարդ է, որ ծաղկում է պատերազմական դաշտերի վրա... Ազատությունը երկնային ծաղիկ է, որ պատկանում է ազգերին»։ Ճշմարիտ է, որ նա իսկույն վրա է բերում. «Ի՞նչ գործ ունին նորա հետ թագավորներն ու կայսրները»³³։ Ապա՝ «... անկախության համար տված պատերազմի ժամանակ ստեղծված երգերի մեջ չես պատահում թագավորություն բառին, իսկ

²⁸ «Փորձ», 1877/78, № 2։

²⁹ «Արձագանք», Թիֆլիս, 1892, № 17, 18, 19։

³⁰ «Փորձ», 1877/78, № 2, էջ 166։

³¹ Նույն տեղում, էջ 185, 189։

³² «Արձագանք», 1892, № 19։

³³ «Արձագանք», 1892, № 18։

եթե պատահում ես, անշուշտ նորանից առաջ կամ հետո մի անեծք է լինում...»³⁴,

Ստ. Պալասանյանի սոցիալ-քաղաքական դիրքորոշման ճիշտ բնութագրման առումով որոշակի հետաքրքրություն է ներկայացնում նաև այն, որ քննվող հոդվածում նա, խստորեն դատապարտելով հունգարական հեղափոխությունն արյան մեջ խեղդող ավստրիական ու ուսական կառավարություններին և գովերգելով խիզախ հեղափոխականներին ու նրանց օգնության հասած արտասահմանյան, մասնավորապես, ֆրանսիացի և լեհ կամավորներին, միաժամանակ քննադատում է հունգարական կառավարությանն այն բանի համար, որ վերջինս՝ չնայած պայքարում էր ավստրիական լծից ազատագրվելու և անկախություն ձեռք բերելու համար, բայց և այնպես ինքը չցանկացավ ազատություն և անկախություն շնորհել հունգարացիների ազգային ճնշման տակ գտնվող շեխերին և խորվաթներին։ Ստ. Պալասանյանը դա համարում է հունգարական հեղափոխության պարտության լուրջ պատճառներից մեկը՝ գտնելով, որ «ինքը Հունգարիան մասամբ յուր սեպհական կործանման համար է աշխատել»³⁵,

Հայտնի է, արդյոք Ստ. Պալասանյանը ծանոթ եղել է Կ. Մարքսի և Ֆ. էնգելսի աշխատություններին, բայց փաստ է, որ նա վերոհիշյալ հոդվածում, ըստ էության, անց է կացնում Կ. Մարքսի այն հայտնի միտքը, թե ոչ մի ժողովուրդ չի կարող ազատ լինել, եթե ինքը ճնշում է ուրիշին։

Ներակացությունը պարզ է. սոցիալական հեղափոխությունը և ազգային-ազատադրական պայքարը դավերգողը, ֆրանսիական ուսուպիական սոցիալիզմի գաղափարներին հարողը, ամեն մի ճնշում և շահագործում դատապարտողը, կապիտալիզմը հակաբնական հասարակարգ որակողը երբեք չէր կարող հարել ոչ ազգային-պահպանողական և ոչ էլ լիբերալ-բուրժուական հոսանքին։ Այդ դեպքում ինչու՞լ բացատրել, որ ուսումնասիրողների ճնշող մեծամասնությունը Ստ. Պալասանյանին համարել են պահպանողական կամ լիբերալ։

Ստ. Պալասանյանի գործունեության և գրական ժառանգության գրեթե բոլոր ուսումնասիրողները որպես ծանրակշիռ փաստարկ վկայակոչում են այն հանգամանքը, որ իր գործունեության սկզբնական շրջանում՝ 1858—1861 թթ. նա գործակցել է Գ. Այվազովսկու հետ և հանդես է եկել «Հյուսիսափայլի» ու Մ. Նալբանդյանի դեմ։ Բայց, մեր կարծիքով, ճիշտ չէ Ստ. Պալասանյանի սկզբնական շրջանի գործունեությանը վերաբերող մասնակի փաստի հիման վրա բնորոշել նրա ամբողջ գործունեությունը, մասնավորապես հրաժեշտ է նկատի ունենալ, որ Գ. Այվազովսկու գործունեությունն էլ մինչև վերջին ժամանակները ճիշտ չի բնորոշվել և ուսումնասիրողների մեծ մասի կողմից անարդար կերպով դիտվել է սոսկ որպես հետադիմական։

Մենք այն կարծիքին ենք, որ Ստ. Պալասանյանը հանդիսանում է դեմոկրատական հոսանքի խոշոր ներկայացուցիչներից մեկը, եղել է Մ. Նալբանդյանի հետևորդը։ Ստ. Պալասանյանի շահագործություններն ու մտահոգությունն աշխատավոր ժողովրդի անմխիթար վիճակի բարելավումն էր։ Ծառայել ժողովրդին, ուղիներ, միջոցներ գտնել նրա տնտեսական և հո-

³⁴ Նույն տեղում։

³⁵ Նույն տեղում, № 17։

դեռ, ազատագրման համար՝ այս էր նրա հավատամքը: Եվ պատահական չէ, որ Ստ. Պալասանյանը այս կամ այն գործչի գնահատմանը մոտենում էր այն տեսանկյունից, թե նա ինչ շահով է ծառայել հասարակ ժողովրդին:

Վաղ-նարոգնիկության գաղափարների ազդեցության տակ Ստ. Պալասանյանը հայ մտավորականությանը կոչ էր անում՝ գնալ գեպի ժողովուրդը, գործել ժողովրդի մեջ, ծառայել նրան: Նա մատնացույց էր անում ոռոգ հեղափոխական-նարոգնիկ Ի. Յակուշինի օրինակը, որը «գյուղացու հագուստ հագած՝ երկար ժամանակ շոգեցած ժողովրդի մեջ» և «գյուղից գյուղ ու գինետից գինետն անցնելով՝ նա օրորում էր ուրախություններին ուրախակից ու ցավերին ցավակից էր լինում...»³⁶,

Առարկնով բուրժուազիայի գաղափարախոսներին, որոնք գովաբանում էին հայ բուրժուազիայի հարստացումը և նրա կապիալները ներկայացնում իբրև համազգային հարստություն և ազգի վերածնության երաշխիք, Ստ. Պալասանյանը ասում էր. «Բայց բանն այն է, որ այս և այն ֆալսֆում հաստատվող հայերը չեն կազմում հայոց ազգությունը, այլ Հայաստանի հողի վրա բնակվող երկրագործ հայ ժողովուրդը. նորա ապամոլության վրա պետք է խորհել, նորա ձեռքին պետք է բան ու գութան ապ, որ յուր հողը մշակե, և այնուհետև նա անշուշտ կը մտածե և յուր մաավոր անդաստանը մշակել»³⁷, ինչպես տեսնում ենք, Ս. Նալբանդյանի օրինակով Ստ. Պալասանյանը հայ ազգ ասելով ամենից առաջ նկատի ուներ երկրագործ, աշխատավոր ժողովրդին:

Այսպիսով, Ստ. Պալասանյանը անցյալ դարի հիսունական թվականների վերջերից մտնելով գրական-հրապարակախոսական գործունեության ասպարեզ որպես պահպանողական հոսանքի պարագլուխներից մեկի՝ Գ. Այվազովսկու գործակից, վաթսուական թվականների սկզբից կտրուկ շրջադարձ է կատարել դժպի՝ դեմոկրատիզմը, կրել ֆրանսիական ուսոպիական սոցիալիզմի, ուսական վաղ-նարոգնիկություն և հատկապես հայ հեղափոխական-դեմոկրատ Մ. Նալբանդյանի գաղափարական ազդեցությունը և դարձել նրա հետևորդն ու գեմոկրատիզմի շարունակողը հայ իրականության մեջ:

ОБ ОЦЕНКЕ СОЦИАЛЬНО-ПОЛИТИЧЕСКИХ ВЗГЛЯДОВ СТ. ПАЛАСАНИЯНА

ГЕВОРГ ХЕДОЯН

Резюме

Изучением литературного наследия Степана Паласанияна (1837-1889) занимались многие исследователи. Однако в оценке социально-политических взглядов Ст. Паласанияна они не были единодушны: одни характеризовали его как консерватора, другие — как буржуазного либерала. Детальное изучение деятельности Ст. Паласанияна показывает,

³⁶ Նույն տեղում, 1876, № 2, էջ 339—340:

³⁷ Նույն տեղում, 1877/78, № 1, էջ 155 (ընդգծումը մերն է — Գ. Խ.):

что начиная с 1861 г. под идейным влиянием М. Налбандяна и французских социалистов-утопистов Ст. Паласанян становится на позиции демократизма. С этих позиций он подвергает резкой критике всякий социальный гнет и эксплуатацию. Нормальным, «естественным состоянием» общественной жизни Ст. Паласанян считает состояние равенства и взаимной помощи. Будущее справедливое общество он представляет себе в виде дружной большой семьи, где каждый работает «по мере своих способностей», но потребляет «наравне со всеми». Ст. Паласанян ратует за свободу, за социальную и национально-освободительную революцию.